

四庫全書

子部

欽定四庫全書

子部
緯略卷二

詳校官中書臣丁榮祚

負外郎臣斗稔文覆勘

總校官知縣臣楊懋珩

校對官中書臣朱烜

謄錄監生臣汪緣

欽定四庫全書

子部十

緯畧

雜家類二 雜考之屬

提要

臣等謹案緯畧十二卷宋高似孫撰似孫字
續古餘姚人淳熙十一年進士歷官校書郎
守處州似孫嘗輯經畧史畧子畧集畧騷畧
及此書今惟子畧騷畧與此書存陳振孫書
錄解題論其讀書以隱僻為博其作文以怪

澀為奇然考證之學正不嫌其博而是編所引亦皆四庫所著錄非馮贄之流詭辭炫俗者比固不得以隱僻譏也明沈士龍又稱其慙騷招隱八風園碁穉搜禡牙之類全錄藝文初學北堂御覽諸書無所增輯知宋世篇集不復具存適用類書誇示宏肆是誠在所不免周嬰危林譏其悞引金樓子以劉休元水仙賦為唐劉子元踈舛亦不能無然其言

篤實終出楊慎丹鉛諸錄之上亦考古者所
必資矣乾隆四十五年二月恭校上

總纂官

臣

紀昀

臣

陸錫熊

臣

孫士毅

總

校

官

臣

陸

費

墀

欽定四庫全書

緯略卷一

宋 高似孫 撰

似孫既輯經略史略子略集略又輯騷略事有逸者
瑣者爲緯略蓋與諸略相爲經緯不以彙分者可續
也

漢唐詔

西漢詔令四百有一自唐虞夏商周上下千數百載爲
書五十八篇又自五十八篇而後起哀周至五代千數

百載間詔令溫醇簡盡有三代遺法唯西漢耳其進退
美惡不以溢言沒其實其中飭訓戒皆至誠明白節緩
而思深至叢脞大壞之餘其施置雖已不合古道當人
心然猶陳義懇到雍容而不迫此其一代之文流風未
泯爲不可及王通嘗以續典謨訓誥誓命之文書雖不
傳漢詔皆可考也唐開元中陳正卿纂漢至唐十二代
詔策章疏歌頌符檄議論謂之續尚書雖襲河汾之意
然其書雜矣宋景文筆記曰文有屬對平側用事供公

家一時宣讀施行似健快然不可施于史傳余修唐書
未嘗以唐人一詔一令載於傳者惟拾對偶之文近高
古者乃可著于篇大抵史近古對偶宜今以對偶之文
入史如粉黛飾壯士笙匏佐輦鼓非所施也今觀唐史
蓋無一詔如文景武宣之世吁難哉

喝

史記曰夏禹扇喝按淮南子曰文王葬死骸而九夷順
武王陰喝人于樹下而天下懷越王決獄不當援刀自

割而戰士畢死感於恩也此但言陰暘不言扇暘也京房易飛候曰有雲如大車蓋十餘此陽沴之氣必有暑暘抱朴子曰指冰室不能起暘死之熱望炎冶不能止噤凍之寒暘者暑沴也

少女風

劉孝威雨詩電舒長男氣枝搖少女風管輅別傳曰輅過清河太守時天旱輅曰今夕當雨時樹中已有少女微風又有陰鳥和鳴又少男風起衆鳥亂翔其應至矣須臾風

雲興玄氣四合大雨注傾易曰艮三索而得男故謂之少男兌三索而得女故謂之少女又曰兌為少女

欵乃

柳子厚漁翁詩欵乃一聲山水綠欵音襖乃音靄唐劉言史瀟湘詩夷女采山蕉緝紗浸江水野花滿髻粧色新閒譌暖廼深峽裡暖廼知從何處生當時泣舜斷腸聲言史之詩則又以欵乃為泣舜之餘聲夷女皆能之不必為漁父棹船相應聲也二字音雖同而字則異以

欸為曖以乃為迺元結系樂府欸乃曲曰誰能聽欸乃
欸乃感人情不恨湘波深不怨湘水清所嗟豈敢道空
羨江月明昔聞扣斷舟引釣歌此聲始歌悲風起歌竟
愁雲生遺曲今何在迺為漁父行次山又有歎乃歌五
章章四句其序曰大厯丁未中漫叟以軍事詣都使還
州逢春水舟行不進作欸乃五曲舟子唱之蓋取適于
道路耳其中一章曰千里楓林烟雨深無朝無暮有猿
吟停橈靜聽曲中意好是雲山韶濩音審其末章亦是

泣舜之意也

蚊民

東方朔蚊賦曰長喙細身晝伏夜存

存一作伸

其屬惡烟爲

掌所捫臣朔愚戇名之曰民崔豹古今注曰河內有人
嘗見人馬滿地如黍米大取火燒皆作蚊蚋飛去因號
蚊蚋爲黍民潘子真詩話載紫姑神蚊賦曰其來續續
紛紛如烟如雲嘗聞之秦謂之蚋楚謂之民用東方朔
賦中字也

賦體

梁武帝賦體曰草迴風以照春木承雲以含化芳競飛
於陽和花爭開于日夜樂萬類之得所豈此心之云舍
欣分竹其厲精慙戎車之屢駕 梁任昉賦體曰俶征侶
兮艤行舟奉君命兮不俟駕屬軒軌之易循值堯民之
可化慙孺雉之聲朝惡鰥魚之在夜奉玉簡之陸離侍
金罍之云舍 梁王僧孺賦體曰雜沓兮翠旌容與兮
龍駕新桐兮始華乳雀兮初化思治兮終朝求人兮永

夜竟大德之未訓何飛光之徒舍 陸倕賦體曰奉欽
明之睿后沐隆平乎玄化參振鷺之充庭侍長徒之曾
舍冀無恨於終南豫告成於芝駕雖就列而陳力終胡
顏于長夜六朝人好作賦體今錄數家于此

食雪

單于幽蘇武置大窖中絕不與飲食雨大雪武卧齧雪
與羶毛并咽之段熲破羗羗復寇張掖熲下馬大戰力
盡羗亦引退且行晝夜食雪四十日

漢紀

陳刪詩食雪天

山近思歸海路長王維詩路繞天山雪家臨海樹秋溫
庭筠詩紅淚文姬洛水春白頭蘇武天山雪三詩皆用
蘇武事而庭筠末句甚奇

旁午

儀禮曰度尺而午注曰一縱一橫曰午漢書霍光傳曰
使者旁午師古曰一縱一橫爲午猶言交橫也盖用此
劉向傳曰螽螟螽午如淳曰螽午猶言雜沓也

洗玉池銘

東坡爲龍眠李伯時作洗玉池銘曰世忽不踐以用爲
急秦漢以還龜玉道熄六器僅存五瑞莫輯趙璧婦玩
完一作魯璜盜竊鼠亂鄭璞鵲抵晉棘維伯時父吊古喟

泣道逢玉人解驂推食劒璚瑊珉錯落其室晚獲拱寶
遂空四壁哀此命世久就淪蟄時節沐浴以幸斯石孰
推是心施及王國如伯時父琅然環玦援手之勞終睨
莫拾得喪在我匪玉欣戚仲和父銘之維以咏德按伯
時石刻序跋曰元祐八年伯時仕京師居紅橋子弟得

陳峽州

峽州名彥默字子真

馬臺石愛而致之齋中一日東坡過

而謂曰斷石爲沼當以所藏玉時出而浴之且刻其形於四旁予爲子銘其脣而號曰洗玉池而所謂玉者凡一十六雙琥璆三鹿盧帶鈎琫琕瑞琰杯水蒼佩螳螂鈎佩柄瑯瑤拱壁是也伯時既下世池亦湮晦徽宗嘗即其家訪之得於積壤中其子碩以蘇文有禁磨去銘文以授使者於是置宣和殿十六玉唯鹿盧環從螭龍眠餘者咸歸內府矣伯時序跋世不多見庸載于此

寧馨

唐張謂詩家無阿堵物門有寧馨兒以寧爲去聲劉夢得贈日本僧智藏詩爲問中華學道者幾人雄猛得寧馨以寧爲平聲蓋王衍傳曰何物老嫗生寧馨兒山濤叱王衍語也又南史曰宋王太后疾篤使喚廢帝帝曰病人間多鬼那可往太后怒謂侍者取刀來剖我腹那得生寧馨兒所謂寧馨者晉宋間人語耳今吳人語音尚用寧馨字爲問猶言若何也東坡詩六朝文物餘丘

攏空使英雄咲寧馨張謂詩東坡詩用寧馨爲是

遺母鮓

世說曰陶侃作魚吏以坩鮓餉母母返書責侃曰汝爲吏以物見餉非唯不能益吾反以增吾憂按列女傳孟宗爲監魚司馬罷職還道作兩器鮓以奉母母曰吾老爲母嘗言唯飲彼水何吾言之不從也乃還鮓於宗宗扶伏遂沉於江二事相類有如此者魚吏爲監魚字佳謝玄與妹書曰昨出釣獲魚以爲三坩鮓今奉送亦用

𧈧字說文曰鮓藏魚也藏魚二字更佳

𧈧音龕纂文曰大𧈧為坊東宮

舊事曰白
𧈧五枚

貝經

師曠有禽經浮丘公有鶴經雖相畜亦有牛經馬經狗
經下至蟲魚有龜經魚經朱仲所傳貝經恠奇今錄于
此仲受經於琴高嚴助為會稽太守仲遺助以徑尺之
貝并致此文曰黃帝唐堯夏禹三代之貞瑞靈奇之秘
寶其有次此者貝盈尺狀如赤電黑雲謂之紫貝素質

紅黑謂之朱貝青地綠文謂之綬貝黑文黃畫謂之霞
貝紫愈疾朱明目綬消氣瘴霞伏蛆蟲雖不能延齡增
壽其禦害一也復有下此者鷹啄蟬脊以逐濕去水無
奇功貝大者如輪文王得大秦貝徑半尋穆王得其殼
懸於昭觀秦穆公以遺燕鼃可以明目遠察宜玉宜金
南海貝如珠如礫或白駁其性寒其味甘止水毒浮一作
伏貝使人寡欲無以近婦人黑白各半是也濯貝使人
善驚無以親童子黃脣點齒有赤駁是也雖貝使病瘡

黑鼻無皮是也瞬

一作瞬

貝使胎消勿以示孕婦赤帶通

脊是也慧貝使人善忘勿以近人赤熾肉殼赤絡是也
鬻貝使童子愚女人淫有青脣赤鼻是也碧貝使童子
盜脊上有縷句脣是也雨則重霽則輕委貝使人志強
夜行晝伏迷鬼狼豹百獸赤中圓是也雨則輕霽則重
布帆無恙

顧愷之爲殷仲堪參軍嘗因假還以布帆借之至破冢
遭風大敗愷之與仲堪賤曰地名破冢真破冢而出行

人安穩布帆無恙楚辭九辨曰還及君之無恙此言及君之無憂耳爾雅曰恙憂也漢元帝詔貢禹曰今生有恙何至不已乃上䟽乞骸骨此言病何憂不差而乞骸骨豈如被虫食心邪凡言無恙謂無憂耳戰國策曰趙威后問使者曰歲亦無恙耶民亦無恙耶說苑曰魏文侯語倉唐曰擊無恙乎又曰子之君無恙乎聘禮亦曰公問君實對公再拜鄭注曰拜其無恙蘇氏演義曰時人以無憂疾謂之無恙神異經曰北方大荒中有獸食

人咋人則病懼人則疾名之曰惺惺恙也常近人村落
入人屋室皆患之黃帝殺之由是北方人得無憂疾謂
之無恙應劭風俗通曰上古之時草居露宿恙噬人虫
也善食人心大患苦之凡相問云無恙

五星聚 四星聚附

殷紂之時五星聚房房者蒼神之精周據之而興 周興於房

宿分星變蒼得天下之祥春秋元命苞 高祖元年十月五星聚于東井以

厯推之從歲星也

李奇曰歲星得其正度其四星北行故曰從也孟康曰歲星先至為主漢

天文志崔浩考古今歷云五星以前三月聚東井按晉天文志東井三十三度分野最濶以乾曜度論之一度二千九百餘里則東井之分合十萬里石氏星經曰是年歲星在東井五星皆從故為有天下之象然以左氏歲星合之又復不然蓋左氏論其常也

五星旋于冀方而魏有天下

魚秦典略

元帝登祚是歲鎮太

白星等聚于牛女之間

晉陽秋

皇朝太宗即位五星在奎居兗州地分太宗時為晉王

領兗海

漢史岑出師頌曰五曜宵暎素靈夜嘆晉傳玄高祖像贊曰五星協象神母告徵

乾鵲

詩人以乾鵠對濕螢唯王荊公以爲虔字音見於鵠之
彊彊易統卦曰鵠者陽鳥先物而動先事而應淮南子
曰乾鵠知來而不知往此修短之分也

悼騷愍騷

後漢班彪悼離騷曰夫華植之有零茂故陰陽之度也
聖哲之有窮達亦命之故也惟達人之進止得時行以
遂伸否則詘而尺蠖體龍蛇以幽潛 晉摯虞愍騷曰
蓋明哲之處身固度時以進退泰則攄志於宇宙否則

澄神於幽昧搞之莫究其外函之固識其內順陰陽以
潛躍豈凝滯乎一槩 漢賈誼吊屈原文曰鸞鳳伏竄

兮鵠臬翔翔謂隨夷溷兮謂跼蹐廉莫耶爲鈍兮鉛

刀爲鈇騰駕罷牛驂蹇驢驥垂兩耳服鹽車所貴聖人

之神德遠濁世而自藏使麒麟可係而羈豈云異夫犬

羊 後漢蔡邕吊屈原文曰鸛鵲軒翥鸞鳳挫翮啄

一作

碎琬琰寶其瓠觚皇車奔而失轄執轡忽而不顧卒

壞覆而不振顧抱石其何補 宋謝延之祭屈原文曰

蘭薰而摧玉貞則折物忌堅芳人諱明潔曰若先生逢
辰之闕三公吊屈原之辭筆力皆高併錄于此

著

梁范筠咏著詩曰數竒不可偶性直誰能紆禎蔡伏靈
異祥雲降溫腴 晉傅玄著賦曰邁衡德於青陽混百
卉而萌生逮朱夏而修茂暨商秋而堅貞雖離霜而未
彫與潛龜乎通靈於是原極以道形極以度以類萬物
之情以通天下之故豈唯終始於事業乃參天而倚數

洪範五行傳曰著之爲言者也草木之壽知吉凶者也

此說甚奇

夫撰著之法四十九著聚之則一而四十九隱于一中散之則四十九而一隱于四十九

中一者道也謂之無則一在謂之有則不可取焉四十九者用也靜則歸于一動則唯觀其用一在其間而不可取此所謂大衍之數五十其用四十有九也

碧芙蓉頌

顏延之碧芙蓉頌曰澤芝芳豔擅奇水屬練氣紅荷比符縹玉擢麗滄池飛暎雲屋實紀仙方名書靈躅水屬二字全未見人用齊王融謝紫鰈啟曰東越水羞實罄

乘時之美南荆任土方揖鮓魚之味劉孝威謝藕啟曰
凡厥水羞莫敢相輩水羞二字亦新

招隱詩

晉張華招隱詩曰隱士托山林遁世以保真連惠亮未
遇雄才屈不伸又詩栖遲四野外陸沉背當時循名奄
不著藏器待無期羲和策六龍弭節越崦嵫盛年俛仰
過忽若振輕絲 晉張載招隱詩出處雖殊途居然有
輕易山林有悔恡人間實多累鸚鵡翔窮冥蒲且不能

視鶴驚遵臯渚數爲矰所繫隱顯雖在心彼我共一地
不見巫山火芝艾豈相離去來捐時俗超然辭世僞得
意在丘中安事愚與智 晉張協招隱詩結宇窮嵐曲
耦耕幽藪陰荒庭寂以閒山岫峭且深淒風起東谷有
渰興南岑雖無箕畢期膚寸自成霖澤雉登壘雒寒猿
擁條吟谿壑無人迹荒楚鬱蕭森投竿修岸垂時聞樵
采音重棋可擬志回淵可比心養真尚無爲道勝貴陸
沉遊思竹素園寄辭翰墨林 晉問丘冲招隱詩大道

曠且夷蹊路安足尋經世有險易隱顯自存心嗟哉巖
岫士歸來從所欽右晉人招隱詩四家今錄于此梁昭
明所采招隱唯左太冲陸士衡王康琚耳

箕子名

司馬彪莊子注曰箕子名胥餘書傳所不載

楚辭

楚辭註楚有先王之廟及公卿祠堂圖畫天地山川神
靈奇偉及古賢聖怪物行事屈原周流罷倦休息其下仰見

圖畫因書其壁呵而問之以洩憤懣舒寫愁思讀此則九歌之意全本于此圖畫鬼神之間猶足以洩憤懣寫愁思況其餘乎今觀屈宋騷辭所以激切頓挫有人所不可爲者蓋皆發於天如羗諍蹇紛侘傺些只者楚語也沅湘江澧修門夏首者楚地也蘭茝荃葍蕙若蘋蘅者楚物也以其土風形於言辭故風雅比興一出於國風二雅之中不可及已嚴助薦買臣召見言楚辭帝甚說之宣帝修武帝故事徵能爲楚辭者九江被公等自

漢以還文人詞客慕其

一作摹擬

軌躅擣華競秀而識其體

要者亦寡爾後才士但襲其體追其韻言雜燕粵事兼夷夏亦謂之楚辭失其旨矣

湘君

山海經曰洞庭之山帝之二女居之郭璞疑二女者舜后不當降小水為其夫人因以二女為天帝之女又曰天帝之女處江為神即列仙傳所謂江妃二女也劉向列女傳曰帝堯之二女長曰娥皇次曰女英堯以妻舜

於為汭舜既為天子娥皇為后女英為妃舜死於蒼梧之野二妃死於江湘之間俗謂之湘君羅含湘中記曰舜二妃死為湘水神故曰湘妃韓愈黃陵廟碑曰秦博士對始皇帝云湘君者堯之二女舜妃者也劉向鄭康成亦皆以二妃為湘君而離騷九歌既有湘君又有湘夫人王逸以為湘君者自其水神而謂湘夫人乃二妃洪興祖曰堯之長女娥皇為正妃故曰君其二女女英自宜降曰夫人也故九歌謂娥皇為君女英為帝子如山海經凡言帝者皆

為天帝如所謂帝之密都帝之下都帝之平圃至言帝
俊帝顓頊稱其號其以娥皇女英曰帝之二女者其稱
謂審矣九歌所謂帝子者亦本山海經言之禮曰舜葬
於蒼梧之野蓋三妃未之從也鄭康成注曰帝嚳立四
妃象后妃四星其一明者為正妃餘三者為次妃帝堯
因焉至舜不告而娶不立正妃但三妃而已謂之三夫
人離騷所譌湘夫人舜妃也夏后氏增以三三而九合
十二人春秋說曰天子娶十二即夏制也康成之論本

取帝王世紀耳世紀曰長妃娥皇無子次妃女英生商
均次妃癸比生二女宵明燭光是也乃知康成所注為
有據依又按秦紀曰死而葬焉今王逸以為溺死非矣

玉帶

王荊公作謝玉帶表甚恨無玉帶事既上表有客

失記
姓名

曰何不用虹玉圍腰公惋悵良久虹玉圍腰四字出常
袞謝賜玉帶表可謂奇事李賀詩曲沼芙蓉波腰圍白
玉冷便不及常公四字薛逢詩帶文瑤白玉符理篆黃

金帶文二字亦佳如李賀又用金魚公子夾衫長密裝
腰鞢割玉方玉方二字亦佳賀詩又云越衫羅袂迎春
風玉刻麒麟腰帶紅王光庭詩玉碾盤龍帶金裝鳳頸
驄李郭詩玉鴈排方帶金鵝立仗衣此三詩當時侍衛
供奉之人所服者然唐制三品以上皆服玉帶韓愈詩
不知官高卑玉帶懸金魚

茂陵中書

武帝遺詔以雜道書四十卷置棺中元康二年河東功

曹李及入上黨抱犢山採藥於巖室中得此書盛以金箱卷後題日月是武帝時也河東太守張純以箱及書奏上之武帝時左右見之流涕曰此是帝崩時殯物宣

帝愴然以書付茂陵

內傳

宋元憲公詩怪牒汲郡來幽經

茂陵聚此事與蘭亭入昭陵相類

尚書故實曰唐太宗酷好書有大王真蹟

三千六百紙率以一丈二尺為一軸內行書有五十八卷褚遂良以蘭亭為第一太宗寶惜者獨此為最於座側朝夕觀覽嘗一日附耳語高宗曰吾千秋萬歲後與吾蘭亭將去也及奉諱之日用玉匣貯之藏於昭陵江南別錄曰鄭元素溫韜之甥也從韜入昭陵見太宗散髮以玉架桁之玄堂兩廂皆石榻以五金之匣藏鍾王

墨蹟僅千軸蘭亭亦在其中自
是散在人間不知流落何所

黛

楚辭曰粉白黛黑施芳澤長袂拂面善留客後漢書曰
明德馬后眉不施黛獨左眉角小闕補之如粟宋起居
注曰西河王沮渠蒙遜獻青雀頭黛百斤說文曰騰畫
眉也騰與黛同釋名曰黛代也滅去眉毛以此代其處也通
俗文曰染青石謂之點黛武元衡詩艷歌愁翠黛寶瑟
思清商張謂詩殘粧添石黛艷舞落金鈿用石黛二字

正用通俗文也

脂澤

蔡邕女誡曰傅脂則思其心之和澤髮則思其心之潤
馮衍集衍與婦弟任武達書曰惟一婢武達所見頭無
釵澤面無脂粉世說曰江淮以北謂面脂爲面澤釋名
曰澤人髮恒枯瘁以此濡澤人唇脂以丹作象唇赤也
北史后妃傳曰晉舊儀典櫛三人掌宮中櫛膏沐膏沐
二字出詩豈無膏沐王維詩邀人傅脂粉不自着羅衣

此言脂也夏英公詩絳唇不敢深深注却怕香脂污玉
簫用脂字尤妙溫庭筠詩蘭膏墜髮紅玉春燕釵拖頸
拋盤雲即澤也

熊經鳥伸

莊子曰吹煦呼吸吐故納新熊經鳥申爲壽而已矣此
導引之士養形之人也彭祖壽考者之所好也魏志曰
吳普嘗問道於華佗佗謂普曰人體欲得勞動但不當
使極耳如搖動則穀氣易消血脉流通病不得生譬猶

戶樞不蠹流水不腐以其常動故也是以仙者法之及
漢時有居士舊爲導引之事熊經鵠顧引挽腰體動諸
關節以求難老吾有一術名五禽之戲汝可行之一曰
彪二曰鹿三曰熊四曰猿五曰鳥亦以除疾病利蹄足
以當導引體中不快起作一禽之戲普行之年九十餘
春秋繁露曰猿長臂所以壽好引其氣也陸龜蒙詩所以親適客兼
能助五禽宋景文詩五禽習雜一作戲探仙術萬
法觀空證佛緣又詩驚猿參唳鶴仲鳥雜經熊

龜息

抱朴子曰城陽却儉少時行獵墮空冢中饑見冢中先
有大龜數迴轉所向無常張口吞氣或俛或仰儉素亦
聞龜能導引乃試隨龜所爲遂不復饑百餘日後人有
偶窺冢中見儉而出之後竟能咽氣斷穀魏王拘置土
室中閉試之一年不食顏色悅澤氣力自若龜英傳曰
南方老人以龜支床行二十年老人死而龜猶活以龜
吐納息也王維詩鳩形將刻杖龜殼用支床許渾詩遊
從依野鶴休息過靈龜宋景文公詩度日銜花翻翠鳥

經年支榻養靈龜

笳却敵

晉劉琨在晉陽爲胡騎所圍乃乘月登樓清嘯賊聞之
皆悽然長嘆中夜奏胡笳賊又流涕並棄圍走劉疇爲
羣胡欲害之疇無懼色援笳而吹爲出塞之聲以動其
遊客之思於是羣胡垂涕而去二公皆以笳聲却敵真
壯士也

雞鳴度關

雞鳴度關皆曰孟嘗君出秦關中雞未鳴關未開下客
爲雞聲群雞和之乃得出然燕太子丹質于秦逃歸到
關丹爲雞聲遂逃前乎此已有之矣

獵碣

周宣王石鼓文章應物韓退之最所贊善如老杜李潮
八分小篆歌亦曰陳倉石鼓亦已訛唯歐陽公以爲可
疑者三蘇勗載記曰石鼓文謂之獵碣共十鼓其文則
史籀所篆周宣王所創獵碣二字甚生蘇氏用此必有

所據任昉述異記曰崆峒山有堯碑禹碣亦用碣字

燒香

佛圖澄傳曰襄國城塹水源暴竭石勒問澄澄曰今當
勅龍取水乃置澄上坐繩床燒安息香呪數百言水大
至李相之賢已集曰燒香蓋始于此按漢武故事曰昆
邪王殺休屠王以其衆來降得其金人之神置之甘泉
宮金人者皆長丈餘其祭不用牛羊唯燒香禮拜事又
在佛圖澄之前也

千弩俱發

漢李陵至浚稽山與單于相值騎可三萬圍陵軍居兩山間以大車爲營引士出外爲陣前行持戟盾後行持弓弩令曰聞鼓聲而縱聞金聲而止虜見漢軍少直前就營陵轉戰攻之千弩俱發應弦而倒虜走上山漢軍擊殺千人單于大驚漢丞相亮出軍圍祁山魏司馬宣王使張郃拒於祁山亮糧盡軍還至清風木門郃追之亮駐車大削樹皮題曰張郃死此樹下預令兵夾道以

數千弩備之卻果至千弩俱發射卻而死

袁布之列傳

龐涓

追孫臏度其行暮當至馬陵馬陵道狹而傍多阻隘
可伏兵乃砍大樹白而書之曰龐涓死此樹下涓果夜
至斫木下見白書乃鑽火讀之未畢齊軍萬弩俱發魏
軍大亂相失涓乃自刎曰遂成豎子之名

史記此言萬弩俱發也

解鳥語

和菟有鳥鳴書一卷王喬有解鳥語書一卷

魏尚字文仲高皇帝時爲太史曉鳥語

謝承後漢書

楊宣爲

河內太守行縣有群雀鳴桑樹上宣謂吏曰前有覆車

粟此雀相隨欲往食行數里果有覆車粟

益州耆舊傳

秦仲

知百鳥之音與之語皆應

史記

管輅聞有鳴鵲來在閤屋

上其聲甚急輅曰東北一婦昨殺夫牽引西家父離婁

候不過日在虞泉之際告者至矣到時果有東北五人

來告隣婦手殺其夫詐言西家人與夫有嫌來殺我耳

管輅別傳

解六畜語

廣漢陽翁偉能聽鳥獸之音嘗乘蹇馬之野而田間有放馬者相去數里鳴聲相聞翁偉謂其御曰彼放馬目眇其御曰何以知之曰罵此轅中馬曰蹇馬蹇馬亦罵之曰眇馬御者不信往視馬目竟眇

論衡

李南乘赤馬行

道逢人白馬先鳴而赤馬應之南謂從者曰此馬言汝今當見一黃馬左目盲者是吾子也可告之快行相及從者不信行二里果逢黃馬而左目盲南之馬先鳴而盲者應之其盲果白馬子

抱朴子

介葛盧來朝聞牛鳴曰

是生三犧皆用之矣

左傳

東方有國人數數解六畜語蓋

偏智之所得矣

缺

廷尉沈僧照校獵中道而還左右問

其故荅曰國有邊事當選人丁何以知之荅曰南山彪

嘯所以知爾

梁典

陸羽水品

一廬山康王谷簾水

二無錫惠山石泉水

東坡詩間携天上小團月來試人間第二泉

三蘄州蘭溪石下水

四峽州扇子峽蝦蟆口水

五武丘寺井水

六廬山招賢寺下方橋潭水

七揚子江南零水

八洪州西山瀑布水

九桐栢淮源水

十廬山龍池山頂水

十一丹陽觀音寺井水

十二揚州大明寺井水

十三漢江中零水

十四歸州玉虛洞香谿水

十五商州武關西洛水

十六吳松江水

十七天台千丈瀑布水

十八郴州圓泉水

十九嚴陵灘水

二十雪水

劉伯芻水品

張又新煎茶水記曰劉伯芻謂水之宜茶者有七較之陸氏品固有異同

也

一揚子江南零水

二惠山石泉水

三武丘石井水

四丹陽觀音寺井水

五揚州大明寺井水

六吳松江水

七淮水

最下

六一居士曰陸羽茶經其論水曰山水爲上江水次之井水爲下又曰山水乳泉石池漫流者上瀑湧湍漱勿食食之令人有癭疾江水取去人遠者井水取汲多者其說止于此未嘗品第天下之水也張又新煎茶水記曰代宗朝李季一作秀卿刺湖州至維揚逢陸處士命謹信者操舟取南零水至陸以杓揚水曰非南零者既傾

而半陸曰此南零矣使大駭曰至岸舟蕩覆半挹岸水

增之

李德裕常令所親取揚子江中零水其人醉忘乃汲石頭城水以給之德裕能辨其非是蓋不止羽

能辨也

德裕好惠山泉置驛取水有僧言長安昊天觀井

水與惠山泉通雜他水十餘缶試之僧獨指其一曰此

惠山泉水也文饒爲罷水驛

東坡愛王女洞泉日致兩瓶恐爲使者所給因破竹

爲契使寺僧藏其一爲信謂之調水符洞在大秦寺

按蒲元傳曰元性多奇思於

斜谷爲諸葛亮鑄刀三千口刀成以漢水鈍弱不任淬

乃取水蜀江水至元曰水雜涪水不中用取水者捍言

不雜元以刀畫水言雜八升取水者叩頭云於涪津覆
水以涪水八升益之然則別水固有此事溜澠之辨蓋
始於易牙也

易牙名巫牙其字也
見孔穎達左傳疏

如東坡汲江水煎茶

詩活水還湏活火烹自臨釣石取深清此二句直入茶
泉理窟夫天下名泉不知有幾寧止如二公所品而已
哉歐公汝陰詩水味甘于大明井山谷省中烹茶詩閤
門井不落第二竟陵谷簾空誤書謂此也

緯略卷一

欽定四庫全書

緯略卷二

宋 高似孫 撰

五神車

金匱曰武王伐紂都洛邑雪深丈餘甲子平旦不知何神五大夫乘馬車從兩騎止門外王使太師尚父謝五大夫賓幸臨之尚父使人持粥一器出進五車兩騎王曰不知有名乎曰南海神曰祝融東海曰句芒北海曰玄冥西海曰蓐收河伯雨師請使謁者于殿下門內引

祝融五神皆驚相視而嘆徐陵雪詩明朝闕門外應見
海神車李嶠詩大周天闕路今日五神車劉庭琦雪詩
姑射山中符聖壽芙蓉闕下降神車蓋用此事

周玉律

晉諸公讚曰世祖時以荀勗所造律得周時玉律比較
正同荀勗奏曰中所出御府銅竹律二十五具其三具
與杜夔左延年法同周庾信上玉律表曰零陵廟前徒
尋舜琯始平城下空論談天上制其禮下習其儀君定

其法臣行其事謹造玉律一具并玉秤尺斗合等至于分粟累黍量茲數籥仰稟聖規叅詳神思節移陰管無勞河內之灰氣動陽鍾不待金門之竹而琰琬事輕般倕慮淺不足展米成均增輝度量庾開府之文亦佳作也

魚先至

大戴禮曰二月祭鮪鮪者魚之先至也月令曰季春薦鮪于寢廟注曰進時美味也毛詩義疏曰鮪魚出海三

月從河上形似鯉而色青黑頭小而尖如鐵兜鍪口在
頷下淮南子曰禹決江䟽河鑿龍門闢伊闕龍門本有
水門鮪魚由其中上行得上過者便爲龍門乃禹辟而
大之故言鑿

三素雲

修真入道秘言曰立春日清朝北望有紫綠白雲者爲
三元君三素飛雲也乘八輿之輪上詣天帝天子候見
再拜自陳某乞得侍給輪轂三過見元君之輦者白日

昇天

一云出洞真黃老經

唐試進士以立春日望三素雲詩為題

蓋出于此陶弘景水仙賦曰迎九玄於金闕望三素於太清李義山送宮人入道詩九枝燈外朝金殿三素雲中侍玉樓吳筠詩瓊臺初為仞孤暎大羅表常有三素

雲凝光自飛繞黃庭經注曰紫青紅謂之三素雲

蘇魏公作

春帖子詞萬年枝上看春色三素雲中望玉宸許冲元春帖子詞三素雲飛依北極九農星正見南方鮑溶溫泉宮詩山蒸陰火雲三素落日溫泉鷄一鳴

代將

樂毅為燕王合五國之兵攻齊下七十餘城盡郡縣以屬燕唯莒即墨二城未下昭王死惠王即位用齊人反間疑樂毅而使騎劫代之樂毅奔趙

戰國策

秦師伐趙王

使廉頗禦之頗固壁不戰趙王惑秦之間以趙奢之子

代頗趙師大敗

史記

晉杜預都督荊州襲吳西陵督張政

大破之政吳之名將據要害之地耻無備取敗不以實告于孫皓預欲間吳邊將乃請還其所獲之衆於皓皓果召政遣武昌監劉憲代之晉軍將至將帥移易傾蕩

之勢竟殄滅焉

晉書

成敗之機在於信間輕易有如此者

老將

史記曰秦始皇問李信曰吾欲攻荊用幾何人而足信曰不過用二十萬人始皇問王翦翦曰非六十萬人不可始皇曰王將軍老矣何怯也翦謝疾歸老於頻陽李信攻鄢郢破之引兵而西與蒙恬會城父荊人因隨之三日三夜不得頓舍大破李信軍始皇聞之大怒自馳如頻陽謝翦曰不用將軍計李信果辱秦將軍獨忍棄

寡人乎翦謝曰老臣罷病悖亂唯大王更擇賢將始皇
謝曰已矣將軍勿復言王翦曰大王必不得已用臣非
六十萬人不可始皇曰聽將軍計耳於是王翦將六十
萬人代信擊荆大破荆軍虜荆王負芻平荆地爲郡
西羗反時趙充國年七十餘上老之使御史大夫丙吉
問誰可將者充國對曰無踰於老臣耳上遣問焉曰將
軍度羗虜何如當用幾人充國曰百聞不如一見兵難
喻度臣願馳至金城圖上方畧然羗戎小夷逆天背叛

滅亡不久願陛下以屬臣勿以爲憂上咲曰諾充國曰
饗軍士士皆欲爲用虜數挑戰充國堅守捕得生口言
羗豪相數責曰語汝無反今天子遣趙將軍來年八九
十矣善爲兵今欲一鬪而死可得耶 建武二十四年
武威將軍劉尚擊武陵五溪蠻夷深入軍沒馬援因復
請行時年六十二帝愍其老未之許援自請曰臣尚能
被甲上馬帝令試之援據鞍顧眄以示可用帝笑曰矍
鑠哉是翁也遂遣援夫翦充國援以區區老臣策勲秦

漢李廣之視三子特伯仲間耳請擊匈奴上以其老不許竟坐數奇引兵失道豈非天哉

使酒

漢書曰灌夫剛直使酒不好面諛漢季布任俠有名孝文時召爲御史大夫有言其勇使酒難近宋孔顗一作凱

使酒仗氣醉則彌日不醒僚寮一作類之間多所凌忽

月窟

顏延年詩月窟來賓日際奉土窟窟也杜子春周禮注

曰今南陽人呼穿土爲竈木玄虛海賦曰大明鑣轡于金樞之穴注曰月窟也

琴心三疊

黃庭經曰端居藥珠十九年琴心三疊化胎仙梁丘子曰三疊琴心三丹田也黃庭經一曰琴心文大率黃庭妙處全以三丹田爲根吐納爲用也

真真

聞奇錄曰唐趙顏於畫工處得一圖畫美女工曰神畫

也呼真真百日即應果如其言一友人以爲妖贈之寶劍欲斬之真真曰某南嶽地仙也君呼妾來今又疑妾妾不可住即携其子上圖圖上添一小兒矣簡齋一作山谷墨梅詩窓間光景晚來新半幅溪藤萬里春從此不貪江路好賸拚心力喚真真

五圖

鮑明遠詩五圖發金記九籀隱丹經米芾法有五故曰五圖出太清金匱記仙經有九轉金液丹法故云九籀

沈休文詩淹留訪五藥顧步佇三芝五藥草木石虫穀也三芝石芝靈芝肉芝

截肪蒸栗

玉書稱玉白如截肪黑譬純漆赤擬鷄冠黃侔蒸栗

魏文

帝書或問玉符曰赤如鷄冠黃如蒸栗白如猪脂黑如純

漆玉之符也

王逸玉部

唐寶記曰玄黃天符色如蒸栗澤若

凝脂仙人山玄卿新宮銘曰碧瓦鱗差瑤階肪截用肪

截奇甚

白瑤宮

李賀卒母夢賀言上帝建白瑤宮令作記又舛凝虛殿
使某纂樂章今爲神仙中人甚樂也

物類相感志

上帝遷都

于月圓構新宮命曰白瑤召李賀爲記

塵外記

長吉忽晝

日見一緋衣人駕一赤虬持一版書若太古篆或霹靂
石文者云當召長吉長吉了不能讀條下榻叩頭言阿
彌老且病不願去緋衣人笑曰帝成白玉樓召君爲記
天上差樂不苦也長吉獨泣道邊人盡見之少之長吉

氣絕常所居窓中勃勃有烟氣聞行車嚙管之聲太夫
人急止人哭待之如炊五斗黍許時長吉竟死

李義山
作賀小

傳

義山之傳蓋得於長吉姊嫁王氏者

文君誄

西京雜記曰司馬相如死文君爲作誄列女傳曰柳下
季死妻自爲誄門人不能損一字古人已如此

嚏占

隨筆謂終風詩願言則嚏鄭氏箋曰女思我心如是我

則嚏也今俗人嚏云人道我此古之遺語也此風自古已有之按漢藝文志有嚏耳鳴占十六卷其多如此則嚏者亦古人深以爲事月令曰季秋行夏令則人多孰嚏是爲病也

習舊事

黃瓊遷尚書令明習故事 李直爲侍中章帝西謁園

陵直陪乘問舊事輒對

東觀漢記

蔣疊爲太僕久居臺閣

明習故事在九卿位數言便宜奏議可觀 胡廣爲太

傅時年八十四練達事體明解朝章屢有補闕之益京

師號曰萬事不理問伯始 龔遂拜尚書侍郎彌綸舊

章深識故典每入朝奏事當廷所問應時捷對

謝承後漢書

王傅拜尚書習漢家舊事在臺歷載夙夜警戒內外不

漏 楊喬拜尚書明習國家舊事故幹機密之職夙夜

周慎退食自公 劉裕爲尚書侍郎自在臺閣閒習國

家故事每有奏議決之於口 魏王粲拜侍郎博物多

識問無不對時舊典廢弛興造制度粲恒定之 李固

薦楊淮累世服事臺閣練達舊典

益部耆舊傳

刁協爲左

僕射時中興草創協以早歷中朝多諳諸事朝廷政體

一稟於協

晉起居注

故事之始

常賢爲丞相老病乞骸骨罷歸丞相致仕自賢始封

丞相弘爲平津侯後以爲故事丞相封侯自弘始梁

丘賀爲郎祠孝昭廟賀筮有兵謀故事上常夜入廟其

後待明而入自此始武帝征伐四夷令民產子二十

歲乃出口錢口錢自此始 惠帝遊離宮叔孫通曰古
者春嘗果方今櫻桃熟可獻之宗廟獻果由此始 諸
葛豐爲司隸舉節收許章章自歸上於是收豐節司隸
去節自豐始 任隗爲大匠建武以來常侍謁者大匠
置自隗始 尚書即舊典科補長史鄭弘爲僕射奏臺
職任尊而賞薄人無樂者補二千石自此始 魏許褚
從太祖征馬超韓遂破之遷武衛中郎將武衛中郎號
自此始 崔邑爲司空封安陽亭侯邑六百戶三公封

侯自此始 鄭默拜大鴻臚母喪舊法既葬還職默陳
懇至久而見許聽大臣終喪自默始 傅初母憂去職
及葬母詔給太常五等吉凶導從其後諸卿大夫給導
自此始 石苞拜驃騎加侍中羽葆鼓吹出叅軍於都
督無敬孫楚揖於苞更相表上故叅軍有敬自楚始

謝尚採拾樂人制鍾石以備太常樂江表有鍾石之樂
自尚始 中宗賜謚多由封爵不考德行王導上疏曰
臣聞大行受大名小行受小名近代已來唯爵謚宜體

前訓使行以謚彰中宗納焉公卿無爵而謚自導始

何法

盛晉中
興書

王導拜丞相漢魏以來群臣不拜山陵導以

中宗契闊布衣匪止君臣而已每一崇進無不親拜山

陵哀動左右拜陵自導始

晉書

後魏李崇除襄州刺史

懸鼓捕盜諸州置樓鼓自崇始

後魏書

諂政

漢張禹居家國家每有大政必與定議 董仲舒去位

歸家朝廷有大議使使者及廷尉張湯就其家問之其

對皆有明法 趙充國乞骸骨就第朝廷每有四夷大
議常與叅兵謀問籌策焉 後漢橋玄徵拜大鴻臚老
乞骸骨經傳有疑使小黃門就問之 晉劉寔以侯就
第懷帝詔曰國之大政就諮于君

給札

上讀相如子虛賦善之召相如相如曰此諸侯之事未
足觀請爲天子遊獵賦上令尚書給筆札乃爲上林賦

史記

荀悅志在獻替

一作納

獻帝好典籍常以班固前漢

書文繁難省乃依左氏傳體以作漢紀辭約事詳詔尚

書給筆札

後漢書

張華有文才晉儀制度釐革勅有司

給筆札多所損益

王隱晉書

文章不起草

北齊杜弼從高祖破西魏命爲露布手即書絹曾不起

草魏收以文章見知奉詔爲封禪文下筆便就不起

草藁

重席

戴憑正旦朝賀帝與群臣說經義不通輒奪其席憑重

十五席 殷亮拜博士諸儒講論勝者賜席亮重席八

九

殷氏
世傳

鹵簿

蔡邕獨斷曰天子車駕次第謂之鹵簿有大駕小駕有
法駕大駕屬車八十一乘祠天於甘泉備之官有其注
名曰甘泉鹵簿中興以來希用之法駕公卿不在鹵簿
中惟河南尹執金吾洛陽令奉引小駕屬車三十六乘

祠宗廟則用之後漢志曰乘輿大駕公卿奉引太僕卿
大將軍驂乘賁誼過秦論曰伏屍百萬流血漂鹵孔璋
檄文曰伏屍千萬流血漂鹵乃從木通典所載鹵簿
則戰楯居外刀楯居內漢書注曰鹵大楯也復古編鹵
所以進船或作鹵字鹵者干櫓之義簿者記籍之稱也
應劭有漢官鹵簿圖古秘畫珍圖目有天地郊祀鹵簿
圖一卷大駕鹵簿圖三卷晉有鹵簿圖一卷齊有鹵簿
儀一卷陳有鹵簿儀三卷鹵簿圖一卷唐世鹵簿正用

漢制行列次第並著儀衛志唐王象有畫鹵簿圖皇朝

天聖中王欽若撰鹵簿圖三卷皇祐中詔修鹵簿圖宣

憲宋公修撰凡十卷至燔槩不得其義

爾雅曰燔牛犂牛也此獸抵觸

百獸無敢當者故金吾仗刻燔牛于槩首

宣和間亦修

鹵簿圖

溫庭筠詩早鴈驚沉細波起晚花鹵簿龍飛回此施之奉引者也張祐詩晏車悲鹵簿廣樂過

蕭韶王建詩拜陵日到公卿發鹵簿分頭入太常此施之山禮者也閻朝隱詩鹵簿山川暗琵琶道路長此施之于臣下者也清晝詩紅塵驅鹵簿白羽擁嫖姚此又兵事也

天公牋

晉劉謐之與天公牋曰昔辛酉之際遭湯旱流烟今子
亥之歲值堯水滔天火延其廬水壞其田何人小子頗
偷雙船由是行無擔石室如罄懸 宋吳道元與天公
牋曰道元居在城南接水近塘草木幽蔚蚊蚋所藏茆
茨漏宇纔容數牀無有高門大屋來風致涼積汗累燠
體日萎黃未免夏暑逆愁冬霜缺則兩幅之薄被上有
牽綿與敝絮徹以三股之絲綆聯以四升之麤布狹領
不掩其巨形促緣不覆其長度伸腳則足出攣蹠則脊

露 王逸天問章句曰天問者屈原之所作也何不言
問天天尊不可問故曰天問劉禹錫問大鈞賦先儒有
言其不然者而况賤耶柳宗元天對精深瓌古成一家
言離騷而後一人而已

八風

易通卦驗曰冬至廣莫風至誅有罪斷大刑立春條風
至赦小罪出稽留春分明庶風至正封疆修田疇立夏
清明風至出幣帛禮諸侯夏至景風至辨大將封有功

立秋涼風至報土功祀四鄉秋分閭闔風至解懸垂琴瑟

不張立冬不周風至修宮室完邊城八風以時則陰

陽變化道成萬物得以育生王當順八風行八政當八

卦也 春秋考異郵曰八風殺生以節翱翔距冬至四

十五日條風至條者達生也

距猶起也自冬至後四十五日而立春東北風應其

方而來 四十五日明庶風至明庶者迎惠也

春分之後庶衆也陽

以施惠之思德

四十五日清明風至精芒挫收

立夏之後性猶

止也時薺麥之屬秀出已備

故剋止其鋒芒收之使成實 四十五日景風至景者強

也強以成之

夏至之候也強言萬物強盛也

四十五日涼風至涼風者

寒以閉也

立秋之候也閉收也言陰寒收成萬物也

四十五日閭闔風至閭

闔者當寒大收也

秋分之候也閭闔盛也時盛收物蓋藏之閭闔或爲當

四十五

日不周風至不周者不交也陰陽未化合也

立冬之候也未化合

言消息純坤無陽也月令曰天地不交而閉塞成冬也

四十五日廣莫風至廣莫

者精大滿也

冬至之候也言冬物無見者風精大美滿無偏

風之爲言萌也其

立字虫動於凡中者爲風

虫動於凡言陽氣無不周也明昆虫之属得陽乃生遇陰

則死故風爲陰中之陽者也

易緯曰八節之風謂之八風立春條風

至東北風春分明庶風至東方風立夏清明風至東南風夏至

景風至南方風立秋涼風至西南風秋分閭闔風至西方風立

冬不周風至西北風冬至廣莫風至北方風呂氏春秋曰何

謂八方風東北曰焱風高誘註一曰融風東方曰滔風一曰明庶風東

南曰薰風一曰清明風淮南子作景風南方曰巨風一曰凱風西南曰淒

風淮南子作涼風西方曰颼風一曰閭闔風西北方曰厲風一曰不周風

北方曰寒風一曰廣莫風

避風

養性經曰治身之道春避青風夏避赤風秋避白風冬避黑風孫思邈論衛生以爲人當避暗風箭風者蓋此之謂也

風經

黃帝風經曰調長祥和天之喜風也抑揚奔厲天之怒風也晉江道風賦所謂若颶厲狂觸物怒號捲揚江海回拔陵峻此蓋用莊子中事喜風二字未經人用也雲貫斗

韓休喜雨賦曰天垂貫斗之雲神召離星之月此二語
瓌新之甚按天文集要曰北斗不欲雲覆之有黑雲覆
天大雨休正用此事

漢唐人物

公孫弘傳贊曰儒雅則公孫弘董仲舒倪寬篤行則石
建石慶質直則汲黯卜式推賢則韓安國鄭當時律令
則趙禹張湯文章則司馬遷相如滑稽則東方朔枚臯
應對則嚴助朱買臣歷數則唐都洛下閎協律則李延

年運籌則桑弘羊奉使則張騫蘇武將帥則衛青霍去
病受遺則霍光金日磾其餘不可勝紀是以興造功業
制度儀文後世莫及孝宣承統纂循洪業招選茂異而
蕭望之梁丘賀夏侯勝韋玄成嚴彭祖尹更始以儒術進
劉向王褒以文章顯將相則張安世趙充國魏相丙吉
于定國杜延年治民則黃霸王成龔遂鄭弘邵信臣韓
延壽尹翁歸趙廣漢嚴延年張敞之屬皆有功迹見述
於世叅其名臣亦其次也後世非唯無此人物亦無此

文章每讀此爲之太息以武帝人才之盛而固所贊殊不及相業也王珪嘗侍宴太宗謂珪曰卿識鑒精通尤善談論自房玄齡等咸宜品藻又可自量孰與諸子珪對曰孜孜奉國知無不爲臣不如玄齡才兼文武出將入相臣不如李靖敷奏詳明出納惟允臣不如彥博處煩理劇衆務畢舉臣不如戴胄以諫諍爲心耻君不及堯舜臣不如魏徵至如激濁揚清嫉惡好善臣于數子亦有一日之長太宗深然其言群公亦各以爲盡已所

懷謂之確論此殊有典謨氣象唐人物之盛至如此似非漢所及

御撰晉書

晉書之首置以御撰今觀天文志曰天聰明自我人聰
明以民爲人太宗不應自避其名又洛書乾曜度以乾
爲甄太宗又不應爲太子承乾避也只是史官所修間
有經御覽裁整者謂之御撰則不可也

白麝

晉中興書曰中興所在獻白麋王述有上白麋表曰毛
色潔素斯誠嘉祥按穆天子傳有曰天子賜黃金之鹿
白銀之麋正謂是也爾雅曰麋牡麋

魚矩反

牝曰麋

音栗

其

子麋

音助

棋

後漢馬融圍棋賦曰三尺之局爲戰鬪之場陳聚士卒
兩敵相當怯者無功貪者先亡先據四道保角依傍緣
邊遮列往往相望離離馬目連連鴈行蹕度間置徘徊

中央收取死卒無使相傷當食不食反受其殃離亂交錯更相度越守規不固爲所唐突深入貪地殺亡士卒狂攘相救先後并沒計功相除以時早訖事畱變生拾棋欲疾營或窘乏無令詐出深念遠慮勝乃可必 晉曹攄圍棋賦曰二敵交行星羅宿列雲會中區網布四裔合圍促陣交相侵伐用兵之象六軍之際也張甄設伏挑敵誘寇縱敗先鋒要勝復後尋道爲場頻戰累關夫保角依邊處山營也隔道相望夾水兵也二關共生

皆自并也持棋合連擇地形也覽斯戲以廣思儀群方
之妙理訝奇變之可嘉思孫吳與白起世既平而功絕
局告成而巧止 晉蔡洪圍棋賦曰旅進旅退二騎迭
驅翻翻馬合落落星敷各嘯歌以發憤運變化以相符
乍似戲鶴之干霓又類狡兔之繞丘散象乘虛之飛電
聚類絕貫之積珠然後枕以大羅繕以城郭綴以懸險
經以絕落眇望翼舒翱翔容與彎掌南指情實西射揚
塵奮迹雖動詳悉或臨局寂然惟棋是陳靜昧無聲潛

來若神抑舒之役成子之賢也或聲手俱發諠譁譟擾
色類不定次措無已再衰三竭銳氣已朽登軾望軼其
亂可取也爾乃心闢犇競勢使揮謙攜手詆欺朱顏相
嫌然局不弘席子不盈捲秉二儀之極要握衆巧之至
權若八卦之初兆遂消息乎天文屈則尺蠖舒則龍翻
崔嵬雲起巉巖浪傳崑岑山結沓如霧分靜若清夜之
列宿動若流彗之互奔殿未結而筭了隸首不得窺其
門局覆亂而不惑妍一作研桑不足識其源或設死而稱

枉臯陶不能治其怨或巧逸以樂胥后變不足以之讚
亂云勢貌多矣孰能究傳遠求近取予一以貫 梁武
帝圍棋賦曰圓奩象天方局法地枰則廣羊文犀子則
白瑤玄玉方眼無斜直道不曲爾乃建將軍布將士列
兩陣驅雙軌徘徊鶴翔差池燕起用忿兵而不顧亦憑
河而必危無成術而好鬪非智者之所爲運疑心而猶
豫志無成而必虧今一棋之出手思九事而爲防敵謀
斷而計屈欲侵地而無方不先行而致寇不助彼而爲

強不讓他以增地不失子而云亡落重圍而計窮欲佻巧而行促劇踈勒之述邐甚白登之困辱或龍化而迢絕或神變而速悟勿膠柱以調瑟專守株而待兔或有少基已有活形失不爲悴得不爲榮若其苦戰未必能平用折雄威致損令名故城有所不攻地有所不爭東西馳走左右周章善有翻覆多致敗亡雖蓄銳以將取必居謙以自牧譬猛獸之將擊亦俛耳而固伏若局勢已勝不宜過輕禍起于所忽功墜于垂成至如玉壺銀

臺車廂井欄既見知于曩日亦在今之可觀或非刼非
持兩懸兩生局有衆勢多不可名或方四聚五花六持
七雖涉戲之近事亦臨局而應悉或取結角或營邊鄙
或先點而亡或先撇而死或君子以之遊神先達以之
安思盡戲奕之要道窮情理之奧祕 梁宣帝圍棋賦
曰蜂起百塗縱橫萬制或無厭而反失或先羸而後濟
後漢班固奕旨曰或虛設豫置以自衛護盖象庖犧
網罟之制隄防周起障塞漏決有似夏后治水之勢一


孔有闕壞顏不振有似瓠子汎濫之勢作伏設詐突圍
橫行田單之奇要厄相刼割地取賞蘇張之姿參分有
勝伐而不誅周文之德逡巡徐行保角依旁却自補續
雖敗不亡繆公之智中庸之方上有天地之象次有帝
王之治中有五霸之權下有戰國之事覽其得失古今
略備 魏應瑒夾勢曰蓋棋夾之制所由來尚矣有象
軍戎戰陣之紀旌旗既列權慮蜂起絡驛雨集魚鱗鴈
峙奮維闡翼固衛邊鄙或飭道偽旋卓轡輶列羸師延

敵一乘虛絕歸不得合兩見擒滅淮陰之謨拔旗之勢也或匡設無常尋變應危寇動北壘備在南麾中基既捷四表自虧亞夫之智耿弇之奇也或假道四布周爰繁昌雲合星羅侵逼郊場師弱衆寡臨據孤亡披掃彊禦廣略土疆昆陽之威官渡之方也挑誘既戰見欺敵對紛拏相救不量進退群聚俱殞力行唐突瞋目恚憤覆局奔潰項將之舛楚懷之悖也時或失謬収奔攝北還自保固完聚補塞見可而進先負後克燕昭之賢齊

頃之德也長驅馳逐見利忘害輕敵寡備所喪彌大臨
疑猶豫筭慮不詳苟貪少獲不知所亡當斷不斷還爲
所謀項羽之失吳王之尤也持棋相守莫敢先動猶楚
漢之兵相拒索輦也 梁沈約棋品序曰奕之時義大
矣哉體希微之趣含竒正之情靜則合道動必適變若
夫入神造極之靈經武緯文之德故可與和樂等妙上
藝齊工支公以爲手談王生謂之坐隱是以漢魏名賢
高品間出晉宋盛士逸思爭流雖復理生於數研求之

所不能涉義出乎幾父象未之或盡凝神之性難限入
玄之致不窮

右棋之賦五棋之論三有能造悟其一當所向無敵況
盡得其理乎



緯略卷二

欽定四庫全書

子部
緯略卷三
四

詳校官中書臣丁榮祚

員外郎臣牛稔文覆勘

總校官知縣臣楊懋珩

校對官中書臣朱烜

謄錄監生臣汪緣

欽定四庫全書

緯略卷三

宋 高似孫 撰

鳳毛

王敬倫姿容似父作侍中公服從門入桓公望之曰大

奴故自得鳳毛也

大奴王劭也世說亦見中興書

謝超宗祖靈運父

鳳宗好學曾作誄奏之帝大嗟賞曰超宗殊有鳳毛恐

靈運復出

南齊書

北平王貞字仁賢世祖第五子也沉

審寬恕太祖稱此兒得我鳳毛

北齊一本無我字

晉尚書閔

鴻見陸雲奇之曰此兒若非龍駒即是鳳雛 龐統字

士元人目為鳳雛

襄陽記

杜詩欲知世掌絲綸美池上

于今有鳳毛岑參詩中郎一鳳毛世上獨賢豪此用鳳毛也劉商隱詩鳳雛皆五色鴻漸又雙飛此用鳳雛也宋元憲詩羽毛丹穴種頭角玉麟兒尤更奪胎

門多好事

漢張竦以列侯居長安貧無賓客時時好事者從之質疑問事論道說書揚雄家貧嗜酒人稀至其門有好事

者載酒饌從學李楷述身賦曰座有清譚之客門多好
事之車好事二字已見竦傳

麈尾

王導麈尾銘曰誰謂質卑御於君子拂穢靜暑虛心以
俟許詢白麈尾銘曰蔚蔚秀格偉偉奇姿荏弱軟潤雲
散雪霏君子運之探玄理微陸龜蒙麈尾賦有曰叩易
論玄驅今駕古散入神明之蹟中含道德之祖此形容
揮用之趣獨孤授竹如意賦有曰發輿滌玄遐鈎獨索

亦是形容用處優於龜蒙二公所作全不似唐人文章

麋之大者曰麋群麋

一作鹿

隨之皆依

一作視

麋尾所轉

出名

苑又思平郡譜曰麋謂之荒麋埤雅曰其尾辟麋

秦醫越醫

晉侯疾病求醫於秦秦伯使醫緩為之未至公夢疾為二豎子曰彼良醫也懼傷我焉逝之其一曰居育之上膏之下若我何醫至曰疾不可為也在育之上膏之下攻之不可達之不及藥不至焉不可為也公曰良醫也

厚為之禮而歸之

左氏成公十五年

齊桓公六年越醫扁鵲過

齊桓侯客待之入朝見曰君有疾在腠理不治將深桓侯曰寡人無疾扁鵲出桓侯謂左右曰醫之好利欲以不疾病為功後五日復見曰君疾在血脉後五日復見曰疾在腸胃後五日見桓侯而還走桓侯使人問其故曰疾在骨髓臣是以無請也桓侯遂卒

春秋後語

春秋時論養生

晉侯有疾鄭伯使公孫僑如晉聘且問疾叔向問焉曰

寡君之疾病卜人曰實沉臺駘為祟史莫之知敢問此
何神也子產曰若君身則亦出入飲食哀樂之事也山
川星辰之神又何為焉僑聞之君子有四時朝以聽政
晝以訪問夕以修令夜以安身於是節宣其氣勿使有
所壅閉湫子小切底以露其體湫集也底滯也露羸也一之則血氣集滯而體羸露
今無乃一之則生疾矣昭左氏公晉侯求醫于秦伯秦伯使
醫和視之曰疾不可為也是謂近女室疾如蠱非鬼非
食惑以喪志良臣將死天命不祐公曰女不可近乎對

曰節之先王之樂所以節百事也故有五節

五聲之節

遲速本末以相及中聲以降五降之後不容彈矣于是有煩手淫聲愒堙心耳乃忘和平君子弗聽也物亦如之至于煩乃舍也已無以生疾君子之近瑟琴以儀節也非以愒心也天有六氣降生五味發為五色徵為五聲淫生六疾六氣曰陰陽風雨晦明也分為四時序為五節過則為菑陰淫寒疾陽淫熱疾風淫末疾雨淫腹疾晦淫惑疾明淫心疾女陽物而晦時淫則生內熱惑

蠱之疾今君不節不時能無及此乎趙孟曰何謂蠱對
曰淫溺惑亂之所生也於文皿蟲為蠱穀之飛亦為蠱
在周易女惑男風落山謂之蠱皆同物也趙孟曰良醫
也厚其禮而歸之

雜卜

蠱卜者春秋後語曰蘇秦事鬼谷子學終辭歸道乏困
行以燕人蠱卜傳說自給 彪卜者博物志曰彪知衝
破又能畫地卜今人有畫物上下者推其奇偶謂之彪

卜 雞卜者史記曰越巫立越祀而以雞卜 鳥卜者
隋書曰女國在葱嶺之南其國俗事阿修羅神及樹神
歲初以人祭或用獼猴祭畢入山祝之有一鳥如雌雉
來集掌上破其腹而視之有粟則年豐沙石則有災謂
之鳥卜開皇六年遣使朝貢其後遂絕 擣菰卜者博
物志曰老子入西戎造擣菰擣菰者五木也或云胡人
亦為擣菰卜 十二棋卜者異苑曰十二棋卜出自張
文成受法于黃石公行師用兵萬不失一逮至東方朔

密以占衆事自此以後祕而不傳晉寧康初襄成寺法
味道人忽見一老翁着黃皮衣竹筒盛此書以授法味
無何失所在遂復流于世 竹卜者荆楚歲時記曰秋
分以牲祠社具供帳盛于仲春之月社之餘胙悉貢饋
鄉里周于族社餘之會其在茲乎此其會也擲茭于社
神以占來歲豐歉或折竹以卜楚詞曰索瓊茅以筵蓍
楚人折竹結草以卜謂為籌也 牛蹄卜者晉書曰夫
餘國若有軍事殺牛祭天神以其蹄占吉凶蹄解者為

合者為吉楊方五經鉤沉曰東夷之人以牛骨占事
呈吉示凶

對策射策

甲乙科謂作簡策難問列置案上在試
者意投射取而答之謂之射策上者為

甲次為乙若錄政紀得失顯而
問之謂之對策也出漢書音義

翟方進射策甲科為郎晁錯舉賢良上親策之詔策百
餘人錯為高第董仲舒以賢良對策為天下第一王嘉
射策甲科為郎何武射策甲科為郎後漢蘇章對策高
第拜議郎劉淑桓帝時對策為天下第一拜議郎建初

元年詔舉賢良方正對策者百餘人魯平策在高第拜

為議郎

司馬彪續漢書

漢射策與對策不同按蕭望之傳注射

謂為難問疑義書於策量其大小署為甲乙之科不使彰顯欲射者隨其所取得而釋之對者顯問以政事經義觀其所對文詞定高下晉潘京為州所辟因謁見問策探得不孝字刺史曰辟士為不孝耶答曰今為忠臣不得為孝子此亦射策遺法耳

唐科

唐之科目視漢最盛因哀錄之

志烈秋霜科

顯慶二年
韓思彥

幽素科

乾封元年
蘇瓌解琬苗
神容何輔元徐昭劉訥

言崔神詞彈文律科

上元元年
崔融

岳牧科

永隆元年
員半千

才膺管樂科

神龍

二年張大求魏啟心魏愔盧絢張
文成褚璆咸慶業郭璘趙不為

才高位下科

馮萬石
冠良貞

張材堪經邦科

三年張九
齡康元瓌

賢良方正科

蘇晉宋務光冠
此盧怡呂慎

抱器懷能科

景龍三年
張侯鉅

茂才異等科

王敬從
盧重元

詞標文苑

垂拱四年房
晉甫瓊王旦

蓄文藻之思科

永昌元年
彭景直

抱儒素之業

科
李愿

臨難不顧徇節寧邦科

長壽二年
薛稷冠此

長才廣度沉

迹下僚科

證聖元年
張漪

文藝優長科

通天元年
韓琬

絕倫科

神功元年
蘇頌

崔元童袁仁敬何鳳孟溫拔萃科崔大足元年疾惡科馮禮洪子與盧從愿趙不欺

石龔黃科長安二年文以經國科景雲二年藏名負暉韓朝宗

俗科李俊文經邦國科先天元年藻思清華科趙冬宣風

興化科郭璘道侔伊呂科張九齡手筆俊拔超越輩流科

杜昱張子漸張秀明常直言極諫科開元二年梁哲人

無咎趙居貞賈登邢巨良才異等科邵閏之文史兼優科

奇士逸倫屠釣科孫五年李昇期康文儒異等科崔侃褚庭誨博學通議科六年鄭

子元達奚珣道文詞雅麗科七年邢巨苗晉卿將帥科十二年裴敦

成文詞雅麗科褚思光趙良器

武足安邊科

十五年鄭昉樊衡

高才沉淪草澤自舉科

鄧景山

高未達沉迹下僚科

十七年吳肇

博學宏詞科

十九年鄭昉陶翰

多才

科

二十一年李史魚

王霸科

二十三年劉瑾杜綰

智謀將帥科

張重光崔圖李廣深

文詞秀逸科

天寶元年崔尤顏真卿

風雅古詞科

六年薛璩

詞藻宏麗

科

十三年楊綰

樂道安貧科

大厯二年楊闕

諷諫主文科

六年鄭珣瑜李益

良方正能直言極諫科

大厯二年裴休裴素李紳南卓李甘杜牧馬植鄭亞崔博崔璵

王式羅群京崔渠韓賓崔慎苗愔常景崔煥崔譙建中元年姜公輔元友直樊澤呂元膺貞元元年常執

誼鄭科田穆賢楊郾裴復柳公綽歸登李直言崔邠鄭敬魏弘簡田元祐徐元祐徐聚四年崔元翰裴次元

李彛崔豐史倂陸震柳公綽趙修徐弘毅韋彭壽鄒儒
立杜倫元易王及王真十年裴珣王播朱諫裴度熊

執易許堯佐徐弘毅杜敷崔群王皇甫鏐王仲舒李同
仲子陵鄭士林丘顙寶歷元年唐中楊儉韋端符舒

元褒蕭敞楊魯士來釋趙祝裴暉常璠李昌實嚴封李
涯蕭夷中求元晦元和三年牛僧孺皇甫湜李宗閔

李正封吉弘宗徐晦賈餗王起郭琳卿姚襲便威長
慶元年龐嚴任畹呂述姚中韋曙李回崔淑崔龜從韋

正實崔知
白陳玄錫軍謀宏遠堪任將帥科大歷二年詳明吏理

達於教化科大歷二年宋琨寶
歷元年韋正實文詞清麗科建中元年

劉公亮鄭轅經學優深科建中元年孫泌
沈封吳通玄黎達白李隨高蹈丘園科

建中元年張紳軍謀越衆科建中元年夏侯審平知
衡良儒蘇哲和鄭澹凌正周謂丁仇孝

弟力田聞於鄉閭科

建中元年郭黃中崔治季牧貞元四年張皓

博通墳典

達於政化科

貞元元年熊執易劉簡甫十年朱穎元和三年馮芭凌旦長慶元年李思玄

識洞韜畧堪任將帥科

貞元元年許贇

清廉守節政術可稱堪

任縣令科

貞元四年李巽

詳明政術可以理人科

貞元十年張平叔李景亮

長慶元年崔郢

才識兼茂明於體用科

貞元十年元稹韋惇獨孤郁白居易曹景伯韋

慶復崔瑄羅讓崔護薛存慶章衍李璠元修蕭俛沈傳師柴宿

達於吏理可使從政科

貞元十年陳祐元和三年蕭睦

軍謀宏遠材任將帥科

元和三年樊宗師長慶二年

吳思李商卿

軍謀宏遠材任邊將科

寶曆元年裴儔侯雲章

鹽梅鹽豉

後漢桓麟七說曰河黿之羹齊以蘭梅崔駰七依曰醢以大夏之薑酢以越嘗之梅張景陽七命曰燂以秋橙和以春梅說命曰若作和羹爾惟鹽梅左傳晏子曰水火醯醢鹽梅以烹魚肉古人調鼎皆用梅也禮記內則楚辭招魂備論飲食而不及豉史游急就篇乃有蕪荑鹽豉史記貨殖傳曰蘗麴鹽豉千合三輔決錄曰前隊大夫范仲公鹽豉蒜果共一甕秦漢以來始有之也

商寶玉

湯誓曰遂

武一作

伐三朶俘厥寶玉誼伯中

仲一作

伯作典

寶周書曰武王俘商舊寶玉萬四千佩玉億有八萬其
多如此韓子曰周有玉版紂令膠鬲索之文王不予文
王有一玉版紂尚欲得之寶玉可知矣湯誥曰不殖貨
利盤庚曰無總貨寶茲所以戒也帝王世紀曰紂敗績
登鹿臺蒙寶衣玉席投于火而歿汲冢書曰紂取天智
玉自焚玉不銷

玉馬

異苑曰晉東瀛王騰鎮鄴天雪門前方數十步融液不積騰怪掘之得玉馬高一尺許又曰弘農楊子陽太元初聞土中有聲掘得玉肫韓詩外傳曰魯哀公使人穿井三月不得泉得一玉羊焉公以為玉羊使祝鼓舞之欲上于天羊不能上孔子見曰水之精為玉土之精為羊願無怪之此羊肝土也公使殺之視肝即土矣易是類謀曰西岳亡玉羊鄭玄注曰玉羊華山之精

二十四圖

二十四真圖五嶽之藏也得之必能仙去飛步太清欲
得道法先沐浴去穢一作污當得東井圖欲朝五帝役山

精當得五嶽圖欲通神靈法仙訣當得入史真形圖欲
通五行當得六甲通靈圖欲存吾身致天神當得九宮
紫房圖欲奉道法當得太清圖欲奉順道當得混成圖
欲通道機當得西昇保錄圖欲通變化當得靈化圖欲
攝大道當得九天圖欲脫身形當得九變圖欲隱身存

神當得養身圖欲定身守神寶當得含影圖欲恬泊守
一以存身當得養身圖欲寂默養志當得精誠守志圖
欲清淨潔白致其芝英當得芝英玉女圖欲驅六丁當
得六陰玉女圖欲致仙籙當得九九道仙圖欲食道氣
當得道引圖欲治道術當得洞中皇寶圖欲為變化當
得偃息圖欲臨鑑定九丹金液當得太乙圖欲登五岳
求神仙芝藥當得開山芝藥圖欲保神形別邪精當得

明鏡圖

玉符
經

龜

周禮曰天龜曰靈屬地龜曰緯屬東龜曰果屬西龜曰

雷屬南龜曰獵屬北龜曰若屬史記曰一曰北斗龜二

曰南辰龜三曰五星龜四曰八風龜五曰二十八宿龜

六曰日月龜七曰九州龜八曰王龜凡八名爾雅曰一

曰神龜

龜之最神明者

二曰靈龜

涪陵郡出大龜甲可以卜緣中文似璫瑁俗呼為靈龜即

今蜺蜺龜一名靈

三曰攝龜

小龜也腹甲曲折解能自張閉好食蛇江東呼為靈

龜也

四曰寶龜

尚書

五曰文龜

甲有文采

六曰筮龜

常在蓍菜下潛伏見龜策

傳七曰山龜八曰澤龜九曰水龜十曰火龜

此皆說龜生之處所

火龜猶火鼠物有含異氣者不可以常理推然亦無所怪也

漢藝文志有龜書五十

二卷夏龜書二十六卷南龜書二十八卷巨龜書三十

六卷雜龜書十六卷此皆灼之法占之文也蓋古之卜

者皆有繇辭周官三兆其頌千有二百如鳳凰于飛和

鳴鏘鏘間于兩社為公室輔專之渝攘公之瑜一薰一

蕕十年尚猶有臭如魚窺尾衡流而方羊裔焉大國滅

之將亡闔門塞竇乃自後踰大橫庚庚子為天王夏啟

以光之類是也今此書亡矣漢人尚視其體今人雖存其意而專以五行為主三代舊術莫有傳者

龜厯

任昉述異記曰陶唐之世越裳國獻千歲神龜方三尺

餘背上有文科斗書記開闢已來帝令錄之號龜厯

伏滔

述帝功德銘曰朝書龜厯之文

柳氏龜經曰龜一千二百歲可卜天

地之終始何以言之三千四十二占於天地千歲之龜

甲黑龜有五色時用之 晉書曰苻堅末高陸人穿井

得龜大三尺背上有文象八卦堅命太卜池養之食以粟及死藏其骨於太廟是夜廟丞高虜夢龜謂之曰我本出將歸江南遭時不遇殞命秦庭又有人夢謂虜曰龜三千六百歲終必妖興亡國之象也其後竟驗

天里

孝經援神契曰周天七衡六間者相去萬九千八百三十三里三分里之一合十一萬九千里從內衡以至中衡從中衡以至外衡各五萬九千五里 洛書乾曜度

曰周天三百六十五度四分度之一夫一度為千九百三十二里則天地相去十七萬八千五百里 關令內傳曰天地南午北子相去九千萬里東卯西酉亦九千萬里四隅空相去九千萬里天去地四十萬里

日月星

徐整長厯曰衆陽之精上合為日徑千里周圍三千里下於天七千里又曰月徑千里周圍三千里下於天七千里

地里

山海經曰帝令豎亥步自東極至于西極五億十選

郭璞

注曰豎亥健行人選萬也

九千八百八十步豎亥左手抱筭右手持

青丘北

淮南子曰禹使大章步自東極至于西極二

億三萬三千五百七十里使豎亥步自北極至于南極

二億三萬三千五百七十里

河圖括地象曰八極之

廣東西二億三萬三千里南北二億三萬一千五百里

夏禹所治四海内地東西二萬八千里南北二萬六千

里又曰地廣東西二萬八千里南北二萬六千里有短
長之制有九阻中土之文德及而不治 呂氏春秋曰
凡四極之內東西五億有九萬七千里南北五億有九
萬七千里 孝經援神契曰計校九州之別土壤山陵
之大川澤所注萊沛所生鳥獸所聚凡七百一十萬八
千二十四頃硃确不墾者千五百萬二千頃 博物志
曰地部之位起形于崑崙從廣萬里高萬一千里神物
之所生聖人仙人之所集崑崙之東北地轉下三千六

百里有八玄幽都方二十餘萬里地下有四柱柱廣十萬里地有三千六百軸互相牽制也

天部

淮南子曰天有九部八紀地有九州八柱九州之外有八埏東方曰沙澤東南方曰沅澤南方曰浩澤西南方曰丹澤西方曰泉澤西北方曰海澤北方曰塞澤東方曰無通澤顏延年詩辰角麗天部提封經地域蓋用此天部也

風流

風流
罪過

晉庾翼與殷浩書曰王夷甫先朝風流士也 宋受禪
謝晦謂劉裕曰陛下受命恨不得謝益壽奉璽裕歎曰
吾甚恨之使後生不得見其風流益壽混字也 謝安
傳史臣曰琰稱真幹卒以忠勇垂名混曰風流竟以文
詞獲譽並階時宰無墜家風 王珣以疾解職歲餘卒
桓玄與會稽王道子書曰珣神情朗悟經史明徹風流
之美公私所寄忽爾喪失悲嘆之深豈徒相悼而已

殷浩善玄言風流談論者所宗顧愷之上疏頌殷浩曰

伏見故中軍揚州刺史殷浩體德沉粹識理淹長風流

雅稱聲蓋當時王夷甫樂廣俱宅心事外風流著稱

唯王樂焉

晉陽秋

王獻之文藝並長而能撮其勝會故

擅名一時為風流之冠

續陽秋

撫軍問孫興公劉真長

何如曰清蔚簡亮王仲祖何如曰溫潤恬和

徐廣晉紀曰凡稱風

流者以王劉為宗焉

范豫章謂王荊州

范甯王悅

卿風流雋望真後

來之秀王曰不有此舅焉有此甥

王氏譜曰王坦之娶慎陽范任女

北齊郎基性清儉在官惟頗令人寫書潘子義遺之書
曰在官寫書亦是風流罪過

子雲千賦

桓譚少好文見子雲工賦頌欲從學子雲能讀千賦則
善之矣新論按藝文志自屈原唐勒至劉向王褒賦二十

家三百六十二篇又自陸賈枚舉至張豐朱宇賦二十
一家二百七十四篇孫卿秦時雜賦至華龍路恭賦二
十五家百三十六篇又客主賦頌德賦至雜賦十二家

二百三十三篇數亦千篇子雲所讀其謂是歟獨淮南賦八十二篇枚皐賦百二十篇今所見者淮南屏風賦枚皐兔園賦耳

古人儀度

姿宇魁秀

魏謩

姿宇

一作富神

秀偉

蕭得聖

風采峭整

阮當國

神情爽拔

李義琛

容止嚴峭

韋斌

姿質軒秀

嚴挺

姿儀瓌秀

呂元膺

姿采玉峙

鄭畋

進止雍閒

裴休

神清明秀

王衍

進止詳華

溫彥博

姿表瓌傑

溫造

舉止都雅

張洎

風度高嚴

劉伯芻

姿制閒美

李嗣

進止雍如

崔沔

儀狀瓌偉

張鎬

神采軒異

趙鼎

精神爽秀

蘇逢吉

狀貌雄偉

閻王審知

神觀爽邁

裴度

風度凝遠

宋璟

風骨秀爽

趙彥昭

舉止秀峙

崔滄

儀幹秀偉

楊謹矜兄弟

姿幹瓌壯

張守珪

容止端秀

裴舉

姿儀秀偉

崔郾

神采秀徹

王戎

神采高徹

王衍

風神高邁

裴楷

進止詳華

高士廉

神氣清爽

源乾曜

體貌閒麗

宋玉

儀容端正

吳孫坦

姿狀秀偉

武元衡

姿貌魁秀

劉德威

姿質偉岸

宗室從誨

姿度魁傑

馬燧

氣象清古

王邕

姿貌魁異

柳澤

髭貌雄偉

宗晉卿

形神秀發

五代和凝

體貌軒特

李棲筠

風度沉整

房紹

器局峻整

裴珣

器量方峻

楊於陵

眉目瓌異

李邕

眉宇秀整

汝陽王

風致峭整

崔遠

姿體魁秀

李義琰

體貌偉麗

路岩

神寓警邁

陸據

古人文章

虞世南文章婉縟

趙涓翰藻豪邁

龐嚴詞章峭麗

崔文為文華麗

張說屬思精壯

封敖屬辭瞻敏

呂溫藻翰精富

楊炎文藻雄蔚

韓愈雄深雅健

似司馬子長崔蔡不足多也

柳宗元卓偉精緻

元幹用思精緻

崔元幹馳騁班固蔡邕間

白居易文章精切

陸康屬文敏速

李賀辭尚奇詭

李商隱瑰邁奇古

李白清雄奔放

徐堅屬文典厚

柳渾屬文簡拔

李翰為文精密

王勃文章宏放

歐陽詹文章切深回復

李華文辭絳麗

韋承慶為文迅捷

許景先屬辭豐美得中和之氣

水精鹽

李白詩客到但知留一醉盤中祇有水精鹽金樓子曰

胡中有鹽瑩澈如水精謂之玉華鹽

野鷺

宋鮑昭野鷺賦曰邈辭群而別偶超烟霧以風行如張
文昌詩但曰曲沼春流滿新波暎野鷺耳則鷺安得超
烟霧而風行耶按西京賦曰鳥則鷓鴣鵲鷺鷥鷺鷥鷺鷥
張揖上林賦注曰鷺鷥野鷺也鮑昭所賦蓋是鷺也

緯略卷三